

Directivas per la construcziun d'agids da catscha

Relaschadas entras

la vischnaunca da Trun

1. Basas legalas

Agids da catscha (definiziun mira giusut) sin territori d'ual representan giuridicamein baghetgs pigns buca forestals che basegnan negina damonda da runcada (art. 27 LCG, art. 17 OCG). Perencunter sto vegnir dumandau per il consentiment dil survetsch forestal (art. 18 OCG) resp. dil possessur d'ual.

2. Definiziun d'agids da catscha

plazza da seser	plazzas semplas da seser ord roma per tiara, senza travestgida laterala e tetg; ei resulta negins donns vid la plonta entras guottas, ferradira e.a.v. ed/ni entras ligiar giu cun fildirom, sugas etc.
sez ault movibel	sez ault ord alumini, material sintetic e.a.v. cun ni senza scala integrada che vegn pusaus enviers ina plonta ni fixaus cun tschentas entuorn il best dalla plonta.
sez ault	basa sin combas-lenn (lattas ni bests da plontas) ni sin in pégn cun generusa surfatscha da basa e da seser, travestgida laterala, cun ni senza tetg.
hetta da laghetg temporara	hetta da laghetg che vegn montada sil pli baul l'entschatta settember e demontada sil pli tard el decuors digl avrel.
hetta da laghetg permanenta	hetta da laghetg che resta permanentamein el liug.
largia da sittar	allontanament da singulas plontas per saver sittar sin la selvaschina giu dad in post da catscha (sez ault ni sez bass).

3. Directivas

- Plazzas da seser basegnan negina lubientscha ufficiala, aschi lunsch che las pretensiuns vid talas vegnan respectadas, v.d. negin material jester e negins donns vid la plonta.
- Damondas per la construcziun d'agids da catscha ein da far cul formular uffical per mauns digl uffeci forestal.
- Mintga singul sez ei d'annunziar individualmein cun in formular uffical per mauns digl uffeci forestal.
- Sezs aults e hettas da laghetg che midan possessur ein d'annunziar agl uffeci forestal resp. al proprietari d'ual cun in niev formular uffical.
- Sezs aults e hettas da laghetg ein da nudar bein veseivlamein cun la numera che vegn attribuida entras la vischnaunca.
- Sezs aults e hettas da laghetg che vegnan buca utilizadas pli ston vegnir allontanadas entras il possessur enteifer in onn. Igl allontanament ei d'annunziar agl uffeci forestal resp. al proprietari d'ual. Succeda negin allontanament, procura igl uffeci forestal per tal. Ils cuosts vegnan adossai al possessur pertuccau.
- La catscha giud sezs aults resp. ord hettas da laghetg ha da succeder conform allas perscripziuns da catscha.

- h) Ils indrezs da catscha (sezs aults, hettas da laghetg) ston vegnir construi aschia ch'ei resulta negins donns vid singulas plontas ed igl uaul. En special eis ei scumandau da pitgar ferradira ellas plontas per fixar aissas, sezs ni scalas. Sin plontas da viez, plontas marcantas per la cuntrada ni ord auters motivs da schurmetg, astga buca vegnir construiu sezs aults.
- i) Ei astga vegnir construiu negins fundaments cun material jester (p.ex. betun).
- j) Material da fildirom, sugas e.a.v. sto vegnir applicaus aschia che tiarzas persunas e selvaschina vegnan buca periclitadas.
- k) Il volumen maximal dalla construcziun cumporta a 5.0 m³ (circa 1.5 x 1.5 x 2m).
- l) Il material da construcziun sto esser naturalis ed astga buca esser tractaus cun mieds chemics.
- m) Indrezs per metter estga ston vegnir allontanai ladinamein suenter la sesiun da catscha da laghetg, sil pli tard denton tochen la fin avrel. Donns caschunai ston vegnir refatgs.
- n) Per la segirtad dils sezs aults resp. las hettas da laghetg ei il possessur responsabels cumpleinamein. La vischnaunca refusa tutta responsablada per accidents e donns che resultan, quei era enviers tiarzas persunas.
- o) Tier eveniments specials ni situaziuns extraordinarias (p.ex. lenna dil bau, lenna derschida...) sa il selvicultur pretender da tut temps igl allontanament immediat dils indrezs da catscha, sche quels impedeschan las lavurs forestalas. Cheutras resulta negin dretg d'indemnisaziun pil possessur.
- p) Largias da sittar astgan vegnir fatgas ni engrondidas mo cul consentiment digl uffeci forestal resp. dil proprietari d'uaul. Las lavurs astgan vegnir exequidas per suenter la marcaziun entras il selvicultur. La gruppa forestala segida vid resgiar ora largias da sittar en loghens che gl'uaul vegn tgiraus, aschilunsch che la vischnaunca ha buca cuosts supplementars.
- q) Largias da sittar han da secumportar cun las finamiras dalla tgira digl uaul. Largias da sittar lubidas ed englars duei il catschadur tener liber tenor basegns.
- r) Novs sezs aults da catscha ston per regla haver ina distanza minimala da 150 m tier sezs aults existents. Excepziuns ston esser motivadas.
- s) Cunterfatgas enviers leschas e la directiva avon maun vegnan denunziadas.

Questas directivas ein vegnidas approbadas dalla suprastanza communal en la seduta dils 16 da december 2019 e passan en vigur cun ils 1 da schaner 2020. Ellas remplazzan las directivas specialas per la construcziun ed allontanaziun da sezs (posts) da catscha e per largias da sittar egl uaul dils 30 da schaner 2002.

Suprastanza communal Trun


Dumeni Tomaschett
President communal


Sandra Gautschi
Actuara